

11. oktober 2016

UKA2016/33

**Meeqqat atuarfianni ilinniusiat (atuartitsissutit) qaffasissusaanik Naalakkersuisut misissueqqullugit peqquneqarnissaanik Inatsisartut aalajangiiffigisassaattut siunnersuut. Misissuinermit inerniliussaq UKA2017-imni saqqummiunneqassaaq.**

(Inatsisartunut ilaasortaq Suka K. Frederiksen, Siumut)

Siumumiit, Inatsisartunut ilaasortap Suka K. Frederiksenip Siumumeersup Meeqqat atuarfianni ilinniusiortarnerup qaffasissusaanik misissuisoqarnissaanik Naalakkersuisut peqquneqarnissaannik Inatsisartunut aalajangiiffigisassaattut siunnersuutaanut ima oqaaseqaasaagut:

Kikkut tamarmik ilinniarsimanissaat Siumup anguniagaraa. Taamaattumik Inatsisartunut ilaasortap Suka K. Frederiksenip Ilinniagaqassutsip qaffassarnissaa siunertaralugu siunnersuuteqarneranut Siumumiit qutsavigiumavarput.

Ilinniarneq siunissamut aningaasaliineruvoq, taamaattumillu ilinniarnermut ilinniaqqinnermullu kikkut tamarmik periarfissaqarnissaat anguniarneqartuartariaqarpoq.

Nunarsuarmi tamarmi sukkatsikkaluttuinnartumik ineriertoriusumi nunatsinni innuttaasut ilinniarluarsimallutillu qaammaasaqarluartuunissaat Siumup pingaartilluinnarpaa, tassami Naalakkersuinikkut, niuerakkut teknikikkullu ineriertorermi, nunattalu nunanik allanik suleqateqarnerani ilinniarluarsimassuseq pingaaruteqaraluttuinnartumik inissisimammatt.

Meeqqat angusarissaarnissaat atuarfiup angerlarsimaffiullu suleqatigiilluarnerisigut anguneqassaaq, taamaattumik angerlarsimaffiup atuarfiullu suleqatigiinnerat nukittorsartuartariaqartoq Siumumiit oqaatigissavarput.

Atuarfitsialammi ilinniartitsisut pitsaanerpaanik tunngavissaqarnissaat atortussaqarnissaallu qulak-keertariaqaripput Siumumiit isumaqarpugut, meeqqavut pitsaanerpaamik ilinniartinneqassappata. Tamatumunngalu ilanngullugu atuarfiit pisortaasa atuarfitsialammut naleqqussaanermut atatillugu pikkorissartinneqartarnissaat periarfissaajuartariaqartoq.

Meeqqat atuarfianni ilinniartitsisussaqaarneq anguniarlugu Inerisaavik Ilinniarfissuarlu suleqatigiilluinnartariaqarput. Najugarisami ilinniartitsisunngorniartarneq annertusarneqartariaqarpoq. TV, radio internetilu ilinniartitaanermut tapertaralugit alimasissumik atuartitsineq ingerlanneqartassaaq. Ilinniartitsisut ilinniarsimasut nunaqarfinni amingaataasarnerat aaqqiiviginiarlugu Siumup anguniagaraa naleqquttunik inissaqartitsisarnissaq.

Kulturerput kinaassuserpullu aallaavigalugu atuartitsineq immikkut ilisimasallit atorluarnerisigut ingerlanneqartuartartariaqartoq Siumumiit isumaqarpugut. Tassungalu ilanggullugu oqaatigissavarput qulequttami taasisutissami misissuinermut ilaatigut naliliinissamut politikkikkut anguniakkat sinaakkutitut assersuutitut atorneqarnissaat Siumumiit kissaatigigatsigu.

Ilinniusiat nalilersorneqarsinnaajuannarnerat uani eqqaamassavarput aammalu sumut sanilliullugit nalinerneqarsinnaanissaat minittariaqanngilarput. Taamaattumik oqaaseqaatitsinni pingaartillugit taakkartorneqartut misissuinermi ilinniusiat pitsaassusaannik naliliinissamut Kalaallit ilikkartariaaseerput, tassa Isigisat aammalu misigisat toqqammavigalugit ilinniutit sananeqartarsimanersut aamma paaserusunnartutut Siumumiit nalilerusupparput.

Tassa naatsumik oqaatigalugu ilinniutit aammalu ilinniartitsisut meeqqamut ilikkarluarfiunerpaamik inissisimassappata ilinniutinik naliliuarnissaq pisariaqartutut Siumumiit isigaarput.

Taamaattumik Siumumiit Suka K. Frederiksenip Siumumeersup siunnersuuteqarneranut qujalluta, siunnersuut Siumumit ilaleratsigu oqaatigissavara. Aappassaaneerneqartinnagulu Kultureqarnermut Ataatsimiitsitaliamut suliarisassanngortinnissaa Siumumiit inassutigaarput.

Ineqi Kielsen  
Siumut